

欽定剿平三省邪匪方略

欽定剿平三省邪匪方略正編卷七十七

戊午年

八月初二日

癸巳

上命軍機大臣傳諭勒保宜綿惠齡恒瑞明亮德楞  
泰曰勒保初抵川境尙能振作乃自專剿王三槐  
股匪以來從歸江市逼向達州復由達州折回開  
萬一帶近又竄安樂坪往來奔逸半載有餘迄未  
擒獲首逆肅清一路僅以虛詞延挨搪塞伊爲總

統不能決機制勝何以爲各路領兵者表率至大神山賊匪雖經惠齡等剿散而首逆高均德等又向龍鳳坪大包山奔逸張漢潮劉成棟等不過賊中小頭目勢已潰散更易殲除明亮等帶領如許勁兵何以追剿多日總未見奏報成擒尤屬延玩總之著名賊首係王三槐徐添德高均德冉文儻羅其清等數犯若能孥獲二三名則其餘黨夥失

所倚恃自必紛紛潰散卽可以次殄平無如伊等  
並不身先士卒鼓勇直前賊匪藏匿山中則云路  
遙險仄難以進攻賊匪四出奔逃則云地方散漫  
不能邀截曲宥之而不知勸切責之而不知懼冥  
頑不靈形同聾瞶勒保惠齡恒瑞明亮德楞泰興  
肇俱著傳旨嚴行申飭倘不能於八月內一律辦  
竣仍前觀望以致師老餉糜軍律綦嚴勿謂可以

倖免凜之慎之

初四日

乙未

明亮興肇奏言

臣

等因額勒登保暫

留太平調養當卽統率兩路官兵緊躡賊蹤於  
十五六七等日截殺後隊計一千三百餘人賊

匪捨命前竄察其行徑總在通江之北陝省接  
壤隘口游行並分三股接續衝突意欲逸出川  
境連據擊獲活賊僉供賊首詹世爵係管藍號

一股張漢潮係管黃號一股李槐係管白號一  
股稱爲三大帥共有三萬餘人因在湖北連被  
官兵殺死萬餘人原欲逃至陝西漢中一帶渡  
江北竄前月底到平利地方聞有官兵從興安  
迎擊又有大兵追殺無奈奔入四川今已無暇  
搜擄人口糧食又不敷用詹世爵出令將三號  
夥黨分爲三隊要看陝西隘口何處兵少卽從

何處逃出等語伏思官兵等被賊匪牽綴在深  
林密箐之中設不繞出賊前迎遏雖日有擒殺  
仍不能破其譎計十九日據常探千總向明山  
報稱賊匪現走之路均兩面陡山蹊徑窄隘勢  
難得手跼得火箝子石梁洞路一道危險異常  
可以出其不意抄出賊前臣等當派副都統綸  
布春原任護軍統領愛星阿副將楊遇春侍衛

噶達朶噶拉黑龍江總管富里善等帶領吉林

索倫馬隊由此抄進臣明亮督兵儘力自樓子

一帶前進壓剿猶恐前後夾擊該匪復扒山散

竄臣興肇率協領德明泰巴圖齊齊哈爾總管

都當阿並荆州滿兵由潮水壩北面山梁老林

後相度賊蹤越過半山以便邀截圖桑阿同副

將多爾濟扎普豆霽叅將楊奎猷遊擊應元寬



張雲守山竹雞溝一帶上右山梁鎮臣長春同  
副將德明額遊擊游棟雲守備王承傑陳應彪  
屈端等由壩峪一帶上左山梁以備橫衝攔剿  
五路分布星夜前進二十日辰刻綸布春愛星  
阿行抵清池子山口遙見賊匪飛奔而來當卽  
策馬下山無如亂石纍纍難以著足乃牽馬跳  
越而下頭股黃號已望見飛遁比及隘口綸布

春等截住白號大半卽用鎗箭殲斃甚多餘匪  
驚慌退走時各路圍圍漸近約計不過三四里  
聲勢聯絡臣飛行知會各路乘此合攻山頂號  
礮一發各路並進殲斃一千餘人瞥見藍號賊  
匪散竄老林藏匿思欲掩截官兵後隊乘間突  
走經臣輿肇自山腰斜出壓下斃賊無算該匪  
直奔後路臣明亮已督兵排立施放進步連環

愈迫愈近擊殺六百餘人該匪遂與白旗賊衆  
合成大隊欲併力衝出有藍白帥字大旗二面  
左右招轉我兵盾密拋裏爭先用命自午至申  
殺賊不下三千餘人該匪始猶短兵接仗繼遂  
拋棄器械分頭覓路逃命綸布春等用馬隊攔  
截愛星阿射死藍旗下騎馬賊一人圖桑阿長  
春等兩路又憑高用木石擲打該匪無從肆遁

半皆跳崖撞石自斃除各路生擒五百六十一  
名外餘皆用鎗礮轟擊無遺旋訊活賊鄭自珍  
等供稱三股頭目輪日衝先行走今日是張漢  
潮在前伊手下有五六千人先走者不過二千  
人其餘同藍號四千餘人皆是精練矛子手留  
後打仗不料四面圍住皆被官兵殺盡詢以詹  
世爵李槐所在隨於活賊內指出白號賊首李

槐一名已經官兵砍落左手腕又於斃賊內指出藍號首逆詹世爵一名業已穿腹射死分別質認衆供確鑿無疑隨將該二逆嚮剖示衆查詹世爵係與姚之富高成傑在襄陽首先起事之人現在三股賊匪悉聽其號令今已被殲戮請將該二逆首級傳示川陝湖北各省以快人心而彰

國憲現探張漢潮捨命前遁仍向北行走此一帶均與陝省之南鄭等處毗連所有邊界籌防已

據宜綸各稱分布嚴密臣明亮現復飛咨宜綸

秦承恩王文雄等相度攔截該匪經此番痛剿之餘人數減少進退皆窮自可尅期擒獲掃除全股至日來秋熱異常各官兵每日行至百數十里偶遇糧餉不繼仍皆奮勇爭先實爲出力

再原任護軍統領愛星阿每次前敵打仗極爲  
勇往前在陝西黃官嶺殲滅張添倫後股賊衆  
並截回阮正通一股入川皆得其力此次與綸  
布春抄出賊前不避險阻復截住賊匪大半各  
路官兵得以兜圍得手尤屬出衆奮勉臣等不  
敢壅於上

聞奏入

上命軍機大臣傳諭勒保宜綿惠齡恒瑞明亮德楞  
泰日本日明亮等奏到剿賊情形雖分兵五路殲  
賊五六千人但所斃詹世爵李槐二犯姓名從未  
奏過僅與前日惠齡等所殲賊目禹斯珍相等而  
賊首張漢潮仍任竄逸且劉成棟現在作何下落  
亦未提及摺內聲敘情形轉似大得勝仗粉飾其  
詞殊屬無謂摺內所稱殲賊計六千餘人則此股



賊匪早當殲盡何以尙有五六千人逃逸可見殲  
斃者多係裹脅之人所言不足深信張漢潮一股  
現在向北奔逃與陝省南鄭等處毗連若明亮等  
不能繞出賊前致任竄入陝境則罪上加罪斷不  
再爲曲宥至摺內所稱官兵日行百數十里秋熱  
異常一節現在早交秋令天高氣爽何得以秋熱  
藉口預留落後地步且官兵畏熱賊匪獨不畏熱

乎又所奏將詹世爵李槐二犯首級傳示川陝湖  
北之處亦屬不值此等無名賊目何必張大其事  
愛星阿前在漢江駐守於賊匪偷過時不能截擊  
是以將伊罷黜俾其立功自贖今既自知愧奮著  
加恩賞給三等侍衛以觀後效

初八日

巳亥

明亮與璧奏言

臣

等自二十日擒斃

詹李二首逆並殲賊過半後因張漢潮率其餘

駁奔赴青石關一帶一面飛咨秦承恩等自北

迎擊臣等漏夜緊躡前進每日擒殺一二百名

不等該匪注意渡江北竄直趨南鄭之毛狗洞

紅廟塘等處經秦承恩分派兵勇遏其去路殲

斃甚多未能越過臣等恐其沿邊西走闌入沔

縣境內飛飭鎮臣長春帶兵五百名趕赴鐵羅

壩以爲西路扼堵俟北面官兵擊回或前後夾

剿或迎頭攔截二十五六等日官兵躡剿更緊  
該匪向西偏北竄至黃官嶺經秦承恩王文焯  
等官兵攔住匪衆果直走西山未至鐵羅壩長  
春帶兵迎至殺賊三百餘人賊勢大窮繞出梅  
子堤希圖仍回通江地界官兵由左手大埡前  
進據長春飛報情形臣明亮當派綸布春愛星  
阿副將楊遇春遊擊應元寬游棟雲帶馬隊抄

前抵剿將及壩口該匪全數下至山麓綸布春  
愛星阿分兩翼抄進憑高據險鎗箭猝發斃賊  
四百餘名該匪驚惶無措左右衝突臣興肇同

圖桑阿率協領德明泰巴克坦布佐領富謙副  
將豆霽遊擊徐大鵬等由山溝內帶馬兵衝出  
攢殺又斃賊三百餘名該匪捨命奪路欲搶出

小壩臣明亮率侍衛噶達鼐噶拉副將冬爾濟

扎普德明額叅將楊奎猷遊擊張雲守備陳應彪等抄上陸梁排鎗緊發共斃賊七百餘人該匪困而猶鬪仍復插旗上擁綸布春另領馬隊從偏坡馳至邀擊勢尤猛鷲賊始却走官兵吶喊圍擊殲戮無算餘匪不復成隊分投前竄老林除生擒賊目張成忠王定邦等九名及餘匪二百一十六名外又於山溝樹林內搜獲一百

一十八名並自行投出者六十二名均經分別  
辦理保釋提訊活賊供稱我等到四川時還有  
一萬四千餘人牲口三千餘頭張漢潮因官兵  
殺斃詹世爵李槐人數少至十分之六藍號人  
本少白號尙有二千餘人他不肯管領所以衆  
心不服他要奔至南鄭渡江被前路截住今日  
想西走沔縣官兵又迎來打仗傷折多人他說

若實在無路可走祇可從老林過南江地方再看沔縣寧羌一帶若卡子不緊卽從彼繞過漢江北走等語查張逆勢已孤單現經兩面遏剿進退無據今雖遁入老林不過攢聚敗匪窮奔

南江地界

臣

明亮已知會秦承恩等於寧沔等

處仍前嚴堵

臣

等因連日趕剿緊迫鍋帳皆不

及攜帶現仍鼓勵各兵星夜遄發趁賊匪殘敗



之餘乘銳設法兜擊前進

同日秦承恩奏言張漢潮等各股賊匪奔竄四川太平通江境內逼近西鄉本年江水淺涸而西鄉邊界綿長八九百里通川隘口一十九處

經臣督同西鄉縣張太亨團聚鄉勇三萬餘人

分布各卡嚴密防守並令王文雄承德田有成帶領官兵分駐要隘互相策應該匪等果由通

江之竹峪關竄至西鄉縣九元子經田有成帶  
領兵勇擊退復竄簡池壩因王文雄承德在井  
泉子大巴山分路迎剿明亮等又已跟蹤趕到  
不敢停留遂從兩河口翻山退回通江沿山西  
竄於七月二十一日由南鄭之毛狗洞竄入牟  
家壩向東北一帶奔趨臣因東路距江最近督  
同遊擊邢承誥守備尙其倫帶領兵丁七百各

趕赴柳林鋪迎截並督令漢興道文需漢中府  
趙洵等團聚鄉勇於江水淺涸處所多設旗幟  
鎗礮晝夜巡防以免偷渡賊遂分三起沿南山  
向西奔竄臣亦即趕至長寨繞出賊前扼住渡

江要口並札會宜綿派防西路之總兵吉蘭泰  
等緊守沔縣寧羌要隘一面札令王文雄速由  
西鄉趕回南鄭直趨康水嶮從西北攔住賊前

迎剿並令城固縣牟鴻鸞帶領鄉勇趕抵法慈  
院防賊東竄王文雄得信卽由簡池壩冒雨疾  
馳兩晝夜趨抵廉水嶺正遇頭二起賊匪約三  
四千人紮住對面山梁山下俱係稻田水深路  
窄頗難施展賊一見官兵卽率領馬隊直從山  
梁壓下王文雄督率將弁兵勇排列礮隊連環  
轟擊斃賊數百人賊自恃得地公然拚死抗拒

並分出馬步兩隊暗從左右兩翼抄截我兵之  
後王文雄驟見卽令參將鍾岳鮑貴等各帶兵  
勇分路迎擊三路官兵齊進斃賊益多我兵乘  
勢搶上山梁又斃賊一千餘人擊斃執大旗騎  
馬賊目二名內王潮桂一名訊係張漢湖妻弟  
生擒八十三名餘衆翻山南竄罈口子潛匿兩  
山老林之內希冀官兵從山溝行走而出而遂截

王文雄探寶令參將鮑貴侍衛特崧額等帶領  
兵勇亦從兩面山梁搜捕前進又斃賊三百餘  
人賊勢窮蹙遂由毛埡子連夜翻山南竄於二  
十七日黎明入四川南江縣境其後股賊匪尙  
在犁壩溝滋擾適城固縣牟鴻騫帶領鄉勇趕  
到截殺數十人復經臣派令邢承誥尙其倫由  
北路紅廟塘帶兵抄截殲戮多名賊卽由梅子

埔奔赴小壩一帶時明亮與肇已於二十六日帶  
兵行抵陝境之大壩子接臣札會卽於二十七

日已刻馳至小壩趕上後股賊匪痛加剿殺餘

賊由大壩竄入南江明亮等隨卽入川緊躡追

剿臣與王文雄卽在沿邊確探賊蹤相機堵剿

同日惠齡恒瑞德楞泰奏言高均德冉文偉

等各股賊匪經大神山黃渡河截殺敗散之後

竄至龍鳳坪一帶負隅據守臣等當卽帶領官

兵分路繞道抄至賊巢北面扼要堵截連日細

加察探冉文德龍紹周龔建等俱屯聚龍鳳坪

距箕山三十餘里該處山勢險峻中有鑼鼓頂

一峯特起下有薄道嶺一道僅容一人行走徑

極窄狹前通馬鞍山亦甚陡削該匪等於馬鞍

山設卡二座扼我官兵其箕山東北廖家塢係



阮正通等屯守箕山西北大廟場係高均德王  
正潮等盤踞均在龍鳳坪之南互爲聲援

臣等

公同商議必須先將馬鞍山賊卡攻佔方可進  
逼賊巢又緣賊股衆多山路叢雜恐賊匪等從

馬腳跡山梁襲我之後尤應分路預防當於二

十四日四鼓分路進攻

臣

惠齡督率總兵李紹

祖副將關聯陞副將銜穆克登布前鋒參領佛

寧<sup>臣</sup>恒瑞督率總兵觀祥副將馬兆瑞遊擊岳

寧阿佐領祿成各帶官兵進撲馬鞍山賊寨<sup>臣</sup>

德楞泰督率副都統阿哈保總兵達音泰巴圖

魯侍衛富僧德墨爾歡保副將德寧許文謨札

勒杭阿遊擊馬瑜等帶領滿漢官兵由消水河

至馬腳跡山梁擬由中壩過河會搶馬鞍山頭

寨適石花溪寨長報稱茶房坪現有賊匪約千

餘人欲搶馬腳跡山梁等語

臣

德楞泰當卽帶

兵扎駐團土包嶺該匪等蜂擁前來搶撲我兵鎗箭齊發並用大礮轟擊斃賊六七十人該匪等始行敗退官兵趁勢下壓又殲三百餘名賊衆四散潰逸當留官兵暫紮山包控扼

臣

德楞

泰卽帶兵抄出叢草嶺中壩過河督兵齊至馬

鞍山西面進攻惟時

臣

惠齡恒瑞帶兵進發距

馬鞍山約五里見有賊匪四五百人自南而來

臣等督兵截殺殲戮殆盡據獲賊供稱係冉文

偉差赴老林場欲搶奪糧臺不意正遇官兵截

殺現在馬鞍山有兩個寨子共有二千餘人是

冉文偉之姪冉添元率眾把守等語當將該犯

等正法臣等鼓勵將士趕至馬鞍山併力搶撲

該匪等捨命迎敵矢石亂下相持兩時之久當

有遊擊張朋手執攔牌跳上卡墻砍開寨柵我  
兵一湧而進齊上山梁奮勇剿殺斃賊二百餘  
人張朋及千總馬光宇外委楊志正均經受傷  
時已天明見有戴翎賊目二人騎馬指揮抵死  
相拒並招呼二寨賊衆盡數前來接應適

臣德

楞泰帶兵從西南首先搶上有黑龍江領催署  
防禦圖敏箭斃戴翎賊目一人賊

以知慌亂其一

人率衆奔逃

臣

等合兵追殺殲戮七百餘人其

戴翎賊目正在驚竄之際又爲吉林甲兵法金保箭斃餘匪捨命奔潰俱向龍鳳坪一帶竄去

臣

等隨將馬鞍山頭寨二寨奪佔計此次殺賊

一千餘人生擒唐義等四十餘名

臣

等提訊唐

義等據供戴翎頭人係冉文儔堂弟冉文富胞

姪冉添元均係起事時主謀之人冉文儔年逾

五十並無主張專恃二人籌畫凡遇打仗二人  
率領匪黨無不聽其指揮今俱破官兵射死餘  
無要供當將該犯等概行梟示臣等隨即乘勝

攻撲龍鳳坪

臣

德楞泰帶領各兵先將大壩口

搶佔連破賊營四處查大壩口距薄道嶺不遠

而薄道嶺爲龍鳳坪賊巢門戶

臣

惠齡恒瑞卽

督官兵分爲兩翼極力攻撲賽冲阿阿穆勒塔

溫春帶領黑龍江吉林佐領西靈阿明德等連  
射賊匪數十人應弦而倒賊匪拒守不住紛紛  
退散我兵刀砍矛戳連斃三百餘人佐領蘇清  
阿委驍騎校額書雲騎尉瑪達奈藍翎前鋒委  
署章京額爾京額均經受傷餘賊捨命竄上鑼  
鍋頂我兵從後追躡又連破賊營二處而龍鳳  
坪賊匪向觀音巖奔竄我兵趕緊追擊又斃賊



五百餘人搶獲鍋帳米糧無算生擒張舉等男  
婦二百四十六名口訊無要供當卽分別辦理  
查觀音巖前係黃土河河南卽係箕山此時若  
卽窮追恐廖豕獮大廟場各股賊匪兩路邀截  
必致前後受敵現在冉文儔等亦俱竄往箕山  
附近一帶屯聚<sub>臣</sub>等惟有竭盡心力趕緊進攻  
再據連日獲犯供稱陝匪李全並未來此高均

德阮正通龍紹周龔建徐萬富唐大信王正潮  
並張自崇等俱與羅其清會合惟冉文偉與羅  
其清意見不合另紮一處等語差探情形亦復  
相同查現在三處官兵合計約有一萬餘人聲  
勢不爲不壯而賊股衆多實有三倍官兵之數  
兜圍環剿旣難得手若專攻一股則各股抄我  
後路亦當預爲籌防此時羅其清與冉文偉稍

有嫌隙臣惠齡於五月間曾經札諭羅其清將  
冉文儔設法縛獻以圖自贖此番冉文儔情急  
相依羅其清雖抗拒不納仍未將其擒獻賊情  
究屬叵測臣等一面設法離間並散其黨與一  
面相機進剿以冀辦竣一股再辦一股斷不肯  
墮其詭計觀望遷延均奏入

上命軍機大臣傳諭勒保宜綿惠齡恒瑞秦承恩明

亮德楞泰曰明亮等此次打仗雖殲賊二千有餘  
生擒三百餘名但所獲張成忠等均非著名賊目  
而首逆張漢潮仍任竄逸劉成棟亦未提及可謂  
無能無恥恐所稱殺賊情形多係空言粉飾未足  
深信明亮等務當激發天良乘勝兜剿速將此股  
賊匪剿盡毋稍稽延又據奏承恩奏賊匪連次竄  
至陝境俱已截殺回川與明亮所奏情形大畧相

同亦未能擒獲首逆不足爲功其興安一帶與川  
省毗連地方宜綿當遵前旨認真堵禦又惠齡等  
剿殺高均德等一股賊匪仍不過攻破尋常卡寨  
射斃無關緊要賊目而高均德等總未能擒獲一  
名亦屬無恥現在高均德冉文儔阮正通羅其清  
吳在箕山地方分路屯聚而冉文儔屢次欲與羅  
其清合夥羅其清抗拒不納惠齡等可乘此賊匪

潰散彼此猜疑之際或直前奮擊或設伏用間以  
期將首逆等迅就殲擒且據稱冉文偉全賴冉文  
富冉添元爲之主謀今該二犯業經射斃冉文偉  
失所倚恃更易擒獲惠齡等所帶官兵約計一萬  
有餘際此秋高氣肅尤爲百倍驍騰亟宜擒縛渠  
魁殲盡黨夥設再不知愧奮迅速進攻復任賊匪  
往來勾結連爲一氣以致剿辦需時必當重治惠

齡等之罪稟之

初九日

庚子

勒保奏言王三槐冷添祿等大夥賊

匪屯踞安樂坪祖師觀等處雖經臣節次督兵

連搶賊卡愈逼愈緊無如該處山勢層疊中間

險要路口均被賊匪安設木城石卡晝夜嚴防

其巖洞一處本係王三槐所設頭卡自臣分兵

攻克之後該匪等守禦愈嚴連日設法躡探惟

巖洞門之石有小路一道兩旁樹林茂密上蓋  
茅棚爲賊匪望哨處所雖道路已經刨挖而石  
角峻峭尙可攀援登陟臣因挑選奮勇兵丁鄉

勇派叅將臣大烈義首貢生劉星渠等帶領於

二十三日乘夜潛往該處理伏密令俟大兵攻

克賊巢相機臣進臣帶領舒亮百祥富爾賽等

督兵由巖洞門正路進攻並派七十五穆克登



阿艾如文等分兵由老觀嘴鹽渠山等處進攻  
祖師觀各路要隘牽綴賊勢二十四日五更

臣

督率舒亮帶領官兵撲近賊卡鎗箭並發賊匪  
一時驚覺仍擲下放鎗捨命抵禦我兵悉力相  
持並不稍退維時詳六烈一路聽聞鎗聲緊急  
卽催令兵勇盤旋詳上點燃火箭順風飛射茅  
棚著火焚燒勢逼賊巢寨內人聲沸騰慌亂舒

亮百祥富爾賽等督兵扳開木城痛殲七八百  
名漆巖者不可勝計賊匪不能抗拒其冷添祿  
一股匪衆又因七十五等官兵分投攻擊相持  
喫緊無暇救援賊勢更形惶急隨踉蹌棄巢奔  
潰我兵奮勇截殺斬梟騎馬賊目四名餘衆竄  
至安樂坪後山經官兵四面圍裏擊斃愈多  
惟恐王三槐被官兵殲殺或情急自戕不能生

臣

致因一面令各路兵勇實力圍圍一面令義首  
劉星漢傳諭匪衆如有情願投出者無論首夥  
概行免罪王三槐因見官兵緊逼無路逃生遂  
拋擲器械而出率衆長跪齊聲乞命臣指揮將  
士當將該首從人等全數擒縛查王三槐爲首  
先起事兇悍渠魁罪大惡極茲幸仰仗

天威將該首逆臨陣生擒實足以快人心而彰

國憲並令拏獲活賊辨認各首級內有偽稱大元帥韓鳳一名與王三槐一同起事之犯又伍民才王作伏二名均係王三槐手下緊要賊目其餘被獲各犯內除安樂坪附近甫經脅從難民概行釋放外其傅思成等三百六十七名悉係王三槐隨從戰手法無可貸當令一一斬梟示衆此外偶有餘匪乘間竄至冷添祿一路者爲

數無多除將王三槐暫時嚴押另行委員解京  
外所有冷添祿股匪現雖踞守祖師觀一帶而  
趁此兵威自無難尅期掃蕩奏入

上命軍機大臣傳諭勒保惠齡恒瑞富成明亮德楞  
泰曰勒保久無報至正深懸盼本日未刻據奏到  
攻克安樂坪賊巢生擒首逆王三槐覽奏欣慰所  
辦甚屬可嘉現在軍聲大振不特冷添祿一股震

警兵威卽川北各股賊匪亦無不聞風膽落勒保  
俟擒獲冷添祿肅清川東後卽移師川北督同惠  
齡明亮等以次剿辦目下惠齡明亮等辦理遲延  
俱不足恃惟望勒保到彼督同調遣力加振作卽  
奏蕩平勒保不可不倍加奮勉也王三槐現已起  
解並著知會沿途各省派委委員小心管押解京  
勒保所帶祇係雲貴等省綠營兵丁尙能將王三

槐擒獲掃蕩安樂坪賊巢而惠齡明亮等兩路仍  
前觀望遷延未見飛章奏捷無能已極惠齡恒瑞  
富成明亮德楞泰與肇著傳旨嚴行申飭伊等聞  
知此信尙不知愧知奮必俟勒保移師川北後督  
率指示方能歲事則功歸勒保一人惠齡等前此  
玩愒之罪何以自贖耶

同日

太上皇帝勅旨諭內閣曰本日勒保奏掃蕩安樂坪賊巢生擒首逆王三槐一摺覽奏嘉慰朕自臨御以來敬

天勤民孜孜不懈年開九秩功歲十全前年授璽後猶復勅幾訓政罔敢暇逸邇年教匪不靖宵旰焦勞猶幸精神強固於一切剿捕機宜無不隨時指示今勒保秉承訓諭將川省首先滋事渠逆王三槐臨陣生



擒其餘窮竄黨勢同摧枯拉朽不日全可蕩平捷  
音馳到正值朕同皇帝駐蹕山莊各蒙古王公祝釐  
瞻覲之時中外同深歡慶而朕於武功十全之外又  
復親見掃除氛祲成此鉅功此皆仰賴

上天嘉佑垂庥朕與皇帝敬感之餘倍深乾惕允宜普  
施渥澤用獎勵勞動保前因平定黔苗已錫通侯之  
賞茲剿辦川匪董率將士調度有方掃穴擒渠膚功

克奏著加恩晉封公爵其在事出力之鎮將文武各員及義民首等著勒保查明功績奏到後另降諭旨分別加恩軍機大臣大學士伯和珅襄贊機宜承旨書諭一手經理夙夜宣勞著加恩晉封公爵福長安同直樞禁勞績倍著自辦理軍務以來一體始終其事著加恩賞封侯爵王杰董誥現雖未在軍機行走而軍興之時亦會隨同辦理沈初戴衢亨那彥成雖

在軍機處行走未久現亦朝夕趨直在事慶成均著  
加恩交部從優議敘以示朕嘉獎勤勞施恩錫慶至意

初十日

辛丑

上諭內閣曰此次勒保擒獲首逆王三槐捷報馳遞  
甚速年來軍報亦無遲悞殊堪獎勵所有沿途驛  
站各員弁著各該督撫查明咨部議敘兵丁馬夫  
照例分別獎賞其兵部捷報處章京除員外郎曠

爾圖前經賞給花翎外主事文光著加恩賞戴藍翎筆帖式任聯魁陳裕翰輔良亦著一併交部議敘

上又諭內閣曰從前永保剿辦湖北賊匪時不能設法兜圍任令竄逸獲咎甚重將伊革職交刑部監禁並將其二子寧志寧怡革去侍衛發往熱河今伊兄勒保生擒賊首王三槐著有勞績著加恩將永

保釋放寧志寧怡亦著加恩釋回在上虞備用處  
拜唐阿上行走以示權衡功罪推恩曲宥之意

十一日 壬寅

上命軍機大臣傳諭勒保惠齡恒瑞明亮德楞泰曰  
昨據勒保奏攻克安樂坪賊巢生擒首逆王三槐  
已降旨逾格加恩茲再賞給勒保大小荷包玉搬  
指玉喜字牌金盒嵌寶石玉帶頭以示嘉獎無已

至意現在川東賊匪祇有冷添祿一股在安樂坪  
相近之祖師觀一帶屯聚經勒保派令七十五等  
分路進攻牽綴賊勢該犯雖與王三槐互相狼狽  
但係分出小股爲數無多今見王三槐業經生縛  
自必望風膽落不敢再思抗拒勒保乘勝移師到  
彼督率七十五等分力進攻勢若摧枯該處一經  
竣事勒保卽統領勝兵速赴川北以次剿辦迅速

歲事昨又加恩將伊弟永保釋放並將永保兩子  
賞給拜唐阿勒保尤當倍加感奮也至川北賊匪  
與川東聲息相通今聞王三槐就擒總統帶領大  
兵將到自必聞風潰散惠齡明亮等正當趁賊匪  
恇懼之時或曉以禍福解散黨夥或鼓勇進攻伏  
兵截擊將高均德冉文儔羅其清徐添德阮正通  
張漢潮劉成棟牟登元等按名擒獲尙可稍贖罪

愆若得勒保擒渠奏捷之信竟毫無愧怍仍復遷延時日必待勒保到彼方能竣事則伊等玩悞之罪更無可曲宥矣



欽定剿平三省邪匪方略正編卷七十八

戊午年

八月十八日

巳酉

上命軍機大臣傳諭勒保惠齡恒瑞明亮德楞泰曰  
自勒保奏到捷音之後朕以各路帶兵大員必應  
稍知愧奮黽勉圖功疊次降旨飭催加之激勵乃  
盼望多日仍未見惠齡明亮等擒一賊首肅清一  
路卽剿賊情形之摺旬餘亦未奏到似此因循玩

愒任意遲延實不解伊等是何肺腑豈竟與賊相

持擁兵不戰耶勒保所帶之兵不過雲貴綠營一

經振作尙能生擒渠逆惠齡明亮等兩路軍營多

係吉林黑龍江勁旅兵力強盛倍于勒保而不能

建毫末之功伊等調度乖方之咎已屬百喙難辭

况以如此得勝之兵不能鼓其銳氣致令久勞於

外師老力疲其罪更無可道明亮等前在小壩等

處截剿賊匪張漢潮仍復任其竄逸劉成棟並無  
下落惠齡等前在箕山一帶亦祇攻克尋常卡寨  
于該處屯聚各賊首並未擒獲一名均屬無能之  
極况各股賊首如冉文儔羅其清徐添德本在川  
省滋事猶謂非明亮德楞泰等專剿之賊藉口推  
諉至若高均德阮正通李全等皆係伊等在陝楚  
地方追逼入川之賊兩載以來任聽敗竄游魂輾

轉竄逸其責又將誰諉上年賊衆由楚省竄至陝境後屢欲偷渡漢江經官兵連次擊退遂由紫陽石泉輾轉逃至漢中北面係惠齡帶兵堵截東面係明亮德楞泰統兵迎擊西南則恒瑞慶成抄出賊前扼要攔阻江岸則柯藩駐劄防守官兵四面合圍賊衆已如魚游沸釜彼時帶兵大員若稍知愧勵合力進攻原不難一鼓殄滅乃彼此遷延觀

望全不以軍旅爲重一味畏葸玩愒以致四面圍  
住之敗殘賊衆任其衝突奔逃與各股賊首聯爲  
一氣今距上年合圍之日又將一載迄未蕝事其  
咎甚重卽使力圖改悔盡縛渠魁已不足掩從前  
之罪乃泄泄如故坐糜廩給罪上加罪伊等將何  
以自贖耶朕因軍務焦勞節次飭催伊等總置若  
罔聞是何意見惠齡恒瑞興肇富成明亮德楞泰

著再傳旨嚴行申飭

二十二日

癸丑

勒保奏言官兵自攻克安樂坪生

擒王三槐後所有冷添祿一股賊匪倚恃地險

仍屯踞祖師觀一帶並將通連安樂坪道路晝

夜堆砌石卡併力守禦

臣

連日分兵進剿並飭

調開縣鑄成大礮解送來營陸續轟擊該匪等

因圍困緊急於初一日晚間復分股衝突者觀

嘴一路營卡冀圖奪路逃竄經七十五百祥等

帶兵截殺

臣

復飛飭穆克登阿艾如文等從旁

邀擊斃賊三四百名餘匪仍卽退回我兵跟蹤

追躡直撲賊巢無如兩旁均有賊匪預伏擲石

放鎗捨命接應不能直上

臣

復遍傳祖師觀一

帶近日復業居民詢以道路據稱祖師觀與安

樂坪中間本隔山溝一道且西北兩面山勢陡

峻難于進攻惟老觀嘴迤南有蛇皮峰一道山  
梁賊匪不時在彼收割糧食如能佔據中間有  
路可通祖師觀等語臣偵探蹤跡前次乘夜撲

卡賊匪亦由蛇皮峰而下自應設法布置先於  
初二三兩日令老觀嘴一帶營卡兵勇於初更  
後潛赴蛇皮峰下點燃火繩散布樹林俟賊匪  
驚覺放鎗卽行撤退以懈其心至初四日晚間



預派舒亮富爾賽等帶兵進攻左手魚鱗口地  
方穆克登阿艾如文等帶兵進攻右手銅鼓包  
地方皆係緊要賊卡約定五更進發其蛇皮峰  
一路仍令兵勇於初更時攜帶火繩前往賊匪  
因見官兵相隔較遠每夜暫來卽去知係疑兵  
並不準備臣隨將此項兵勇撤回俟至四更卽  
派七十五百祥等另帶兵勇由蛇皮峰之下板

援潛上直抵賊匪頭卡千總羅思舉首先率領  
兵勇跳越壕溝扳開木柵拋擲火彈燒燃卡內  
草棚我兵俱卽盤旋躍入匪衆猝不及防兵勇  
乘勢剿殺斃賊五百餘名遂將蛇皮峰一帶山  
梁奪據其魚鱗口銅鼓包兩路官兵分投攻撲  
不避鎗石一擁競進各斃賊二三百名餘匪跟  
蹌奔走俱退回祖師觀山梁拒守生擒賊匪一

百十六名內有徐景雲譚正榮二名俱係冷添  
祿手下緊要賊目據供冷添祿因官兵攻破安  
樂坪王三槐已被擒獲實在畏懼商議要想奪  
路逃走無如四面官兵圍緊又幾次遣人探聽  
徐添德林亮功等現在何處以便邀來救應連  
日未得回信祇可在祖師觀一帶暫時踞守餘  
無要供當將該犯等一併正法伏念冷添祿股

匪其勢已孤現雖困守一隅不過苟延殘喘卽該匪捨命衝突四面營卡圈圍嚴密斷不致令遠颺臣惟有督率將士設法上緊攻剿以期全

數掃除至川北之賊羅其清冉文儔等現與高均德等股或屯聚營山或分竄儀隴一帶而富成所剿之徐添德亦從廣安擾至蓬州南部據報欲與冉文儔等合夥臣惟諄囑惠齡設法兜

截毋任再竄陝疆

同日明亮與肇奏言查張漢潮經官兵痛剿以後率其餘黨欲從南江邊界闖入寧河一帶繞

出漢江

臣

等料其譎詐先分兵在商溪望倉壩

兩路堵住先後擒殺探馬二十一名該匪計窮初二日復由沙壩地方乘夜繞出通江青石關北走南鄭境內官兵分爲兩路緊跟橫截初四

日在關東廟合力夾擊斃賊二百餘名初七初九等日在西鄉之堰口茶鎮等處分投緊接三仗共斃三百餘人生擒四十六名內有副頭目向得富等七名官兵僅裹帶乾糧漏夜進發登陟復不避險阻該匪實已聞風膽落兼之東面紫陽經宜綿派兵遏住極爲嚴密西北城固一帶又經秦承恩王文雄撥令官兵分投堵截該

匪往來西鄉界內窮竄祇在偏南奔突此一帶  
川陝地界交錯叢山密箐人跡罕經匪衆忽東  
忽西莫辨首尾以致未能痛剿日來秋雨又復

如注山澗漲發坡徑皆被賊挖斷動須搭橋砌

路臣等焦灼難言初十日晚探知該匪不能越

入紫陽折回西走經王文雄帶兵堵截又派兵

在大石川攔擊臣明亮於三鼓後自下川黃黑

壩一路繞前十一日巳刻抵西河口正遇匪衆  
衝至當令綸布春愛星阿侍衛噶拉總兵長春  
叅將楊奎猷帶馬兵迎面直進圖桑阿同副將  
多爾濟扎普等帶步兵自南面排列壓擊該匪  
一見卽退後却走臣等率侍衛噶達鼐副將楊  
遇春豆霽等由山背抄出賊後山梁吶喊壓下  
匪衆各占山頭竟敢直撲三次勢仍克悍相持



直至酉刻官兵三面兜合鎗箭並發加以短兵  
相接共斃賊八百餘人生擒五十六名餘匪始  
奔上南面陡梁乘夜散竄驚跌墜崖者甚衆獲  
其騾馬百餘頭匹歷訊活賊同供張逆日前原  
欲由紫陽平利仍回湖北今被官兵晝夜追截  
裹脅之人隨擄隨散實在勢孤力怯現在打仗  
之人皆係舊日習教積慣矛手思欲拚命奪路

尋江面淺處偷渡等語查旬日內賊匪連被剿  
急已自知萬難東竄楚境且無片刻休息大形  
窮蹙臣明亮現緊躡賊蹤隨時知會宜綿秦承  
恩王文雄等將防堵之兵分層密堵以便乘銳  
緊發臣等總當竭盡心力趕緊殄滅此股賊匪  
稍贖前愆均奏入

上命軍機大臣傳諭勒保宜綿惠齡恒瑞明亮德楞

秦曰賊首冷添祿見王三槐業經被擒自知無路  
逃竄負嵎困守經勒保等分路進攻將賊匪要隘  
蛇皮峰奪據圍嚴密自可不日成擒竚望捷音  
踵至首先奪卡之千總羅思舉著以應陞之缺陞  
用以示獎勵至冷添祿一股既可尅日殄除則開  
縣雲陽以東地方卽臻寧謐林亮功等雖尙在忠  
州墊江竄聚人數更屬無多勒保剿滅冷添祿後

就近移師該處乘勝進擊無難悉數殄擒從此鼓  
行而前速赴川北督率惠齡明亮等以次剿辦迅  
勉擒渠實朕所昕夕期望勒保受恩深重不可不  
倍加奮勉至張漢潮劉成棟等被陝省官兵截回  
勢已潰散更易成擒乃本日據明亮奏剿賊情形  
仍不過在西鄉堰口等處兩次打仗殄賊千餘名  
祇係裹脅之衆而首逆迄未擒獲摺內尙稱竭盡

心力趕緊殄滅仍屬空言搪塞又摺內所稱秋雨如注山澗漲發之語尤不成話如果雨多水漲不能行走豈賊匪獨能飛越乎可見明亮等並未親身督率僅派將弁在前敵帶兵輒據稟報之詞藉口支飾再惠齡恒瑞等剿辦高均德等一股俱竄聚營山箕山一帶徐添德亦欲從蓬州南部竄往合夥正可趁各股首逆聚集一處之時設法攻圍

按名擒獲乃竟音信杳然不知伊等在彼所辦何  
事豈伊等聞知勒保之信竟毫無愧激不思立功  
自贖耶惠齡恒瑞興肇富成明亮德楞泰均著再  
傳旨嚴行申飭

二十四日

乙卯

秦承恩奏言查竄匪張漢潮一股

經官兵連次截殺折回南江明亮等緊躡追剿

復從碑壩翻山由回軍壩一帶向東奔逸

臣

當

卽飛飭叅將張受榮遊擊觀音保於城固一卽

壩設伏邀擊截殺二百餘名餘衆向西鄉堰口

一帶分爲兩股晝夜狂奔王文雄在西路得信

卽率同叅將鍾岳等星夜馳往與張受榮等分

路追截臣另派遊擊邢承誥等帶領兵勇在東

山一帶扼截後路明亮等亦跟蹤趕往兜圍宜

綿現已趕至石泉派柯藩慶溥等分布石泉紫

湯要隘相機堵剿惟現據四川廣元縣劉清稟  
報川省徐添德冉文儔高均德樊人傑龔姓等  
各股賊匪因被德楞泰惠齡截剿情急由儀隴  
逃向廣元一帶又另據差探南江大河口亦有  
賊匪屯紮切近陝省南鄭寧羌沔縣等屬此時  
各路官兵俱已追剿東去距南鄭等縣較遠除  
宜綿原派總兵索費英阿副將李文蔚在寧羌



防守臣已星飛札飭探蹤堵禦外現惟督飭各  
屬於要緊隘口多集鄉勇嚴密防範並飛札宜  
綿明亮王文雄酌量情形如果竄匪張漢潮尅  
日可以擒獲卽交柯藩等剿洗餘匪明亮等速  
卽帶兵馳回西路堵剿奏入

上命軍機大臣傳諭勒保宜綿惠齡恒瑞秦承恩明  
亮德楞泰曰現在張漢潮一股賊匪已向東奔逸

而徐添德冉文儔等各賊匪據秦承恩奏因被惠齡德楞泰截剿情急由儀隴逃向廣元一帶又探得南江大河口亦有賊匪竄聚是箕山賊匪自前此惠齡等攻克馬鞍山龍鳳坪營寨後敗逃之賊又復分股奔竄逼近陝境總由伊等不能乘賊匪屯聚之時設法攻圍繞道兜剿以致各股賊首分路竄出惠齡恒瑞德楞泰俱著傳旨再行申飭仍

俱革去花翎令其戴罪圖功自贖若再不知畏懼  
怙奮任聽賊匪等合夥闖入陝境則罪上加罪斷  
不能幸邀曲貸矣至陝省邊界前經降旨責成宜  
綿秦承恩王文雄等嚴密防守今竄匪逃至廣元  
南江一帶與南鄭寧羌沔縣接壤西面祇有索費  
英阿等在彼兵力較單著傳諭宜綿秦承恩王文  
雄卽於寧沔南鄭緊要關隘深溝高壘嚴密堵禦

設伏邀擊漢江一帶亦應列戍嚴防或設疑兵使之不能闖入此爲最要明亮如已將張漢湖擒獲亦卽馳赴西路協同堵剿額勒登保前在太平養病現在自己向愈着卽帶現有之兵迅赴寧沔南江一帶酌量情形幫同堵截若稍有疎虞惟伊等是問柯藩愛星阿卽前車之鑒也

二十六日  
景安奏言本月十五十六等日登

接探報川省通江等處竄匪突入陝境之西鄉

白沔峽及石泉梅湖等處焚掠總在沿江一帶

奔竄臣查該匪擾至石泉江岸非希圖搶渡北

竄卽由南岸東奔楚省竹谿竹山房縣鄖縣鄖

西與陝省毗連處所共計一千餘里雖經臣相

度要隘安設兵勇令將軍成德總兵路超吉等

分投協堵但路徑紛歧兵力尙形單薄臣已飛

飭各營卡加緊防範並齊集義勇各守要隘毋  
許一名闖入并查明前此撤回湖南兵內挑選  
數百名飛速調來二竹將邊卡量加增設臣仍

在鄖竹等縣適中之地督率稽查隨時踴聽賊  
蹤以便策應截擊至南路巴東邊界臣實不能

兼顧因多撥兵勇擇要設卡該處現有兵勇七  
千餘名佈置已屬周密惟提臣文圖染患濕瘡

臣派員查驗據稟頭面潰爛病勢較前有增帶  
兵不能得力可否准令回旗調養之處恭候

諭旨此時巴東一路僅有鎮臣王凱一人該鎮人頗  
奮勉但到楚不久情形未能熟諳且該處現集  
鄉勇不下五千名尤須大員管領調度臣已飛

咨高杞趕赴巴東督率嚴防以免顧此失彼之  
慮奏入

上命軍機大臣傳諭勒保宜綿景安高杞明亮曰昨據秦承恩奏張漢潮一股從西鄉堰口奔竄宜綿已趕至石泉並派柯藩慶溥等分布要隘相機堵剿是東面已有官兵遏其去路未必卽能竄入楚境景安飛飭各營卡加緊防範亦屬先事預防之策但張漢潮一股人數無多且屢經官兵剿殺勢已潰散乃明亮等跟蹤追躡總未成擒茲又任其



竄至石泉焚掠伊等帶領如許勁兵任聽賊匪縱橫如入無人之境所辦何事昨因惠齡恒瑞德楞泰不能截住箕山各賊匪俱已革去花翎今明亮與肇之罪與惠齡等相埒亦均着革去花翎俾其帶罪自贖並傳旨嚴行申飭若再不能趕上賊匪與宜綿等兩面夾擊或竟任令賊匪再向東奔闌入楚境必當重治伊等之罪並著宜綿王文雄等

遵照昨旨併力堵截勿令賊匪北渡漢江東賊尙  
有踈虞亦惟宜綿王文雄等是問至景安奏稱文  
圖病勢日增帶兵不能得力文圖著准其解任回  
旗調養其楚省巴東邊界亦關緊要著高杞速行  
馳往會同王凱實力嚴防不可藉詞逗留文圖所  
遺雲南提督員缺著勒保於出力總兵內保舉二  
三員候旨簡放

二十八日已未惠齡恒瑞德楞泰奏言竊照高均

德冉文儁等賊股衆多分駐箕山南北若專擊  
一股則各股接應且恐羅其清乘機抄襲尤與  
我兵不便查羅其清負嵎據險聚衆二萬餘人  
各賊藉其聲勢結寨相依如將羅其清一股挫  
其克鋒則各股易於剿辦但箕山陡險未易仰  
攻計惟誘其下山以圖截殺當於七月二十八

日三更臣惠齡密派總兵李紹祖副將關聯陞

穆克登布前鋒叅領佛寧臣恒瑞密派副將九

十遊擊岳寧阿佐領佛爾清額祿成各帶官兵

前赴龍鳳坪前面埋伏臣德楞泰密派賽冲阿

阿哈保總兵達三泰侍衛富森德副將德寧遊

擊馬瑜等帶領兵丁潛赴石花寨下埋伏接應

次日卯刻臣等各將官兵撤退放礮移營陸續

下山之際見箕山有白旗十數桿蜂擁而來忽

分兩股一抄

臣

惠齡恒瑞營盤一撲

臣

德楞泰

官兵後尾當有兩路設伏官兵從後掩殺臣等

帶領阿穆勒塔溫春觀祥等折回迎擊兩面合

攻殺斃賊匪二千餘人奪獲刀矛器械八百餘

件生擒何世官等一百二十四名訊據供稱羅

其清與陝匪各股俱會會過惟與冉文儔有隙

不許上山冉文儔遂約陝匪等分屯箕山坡下  
仍思借其聲援羅其清今早見官兵移營隨撥  
五千人下山抄襲今被官兵剿殺大半掌旗頭  
人王正奉亦被射死等語當卽概行正法臣等  
欲乘勢攻剿旋據差弁探報高均德龔建龍紹  
周徐萬福唐大信等各股陝匪見箕山賊匪被  
殺甚多同時分往西北奔竄又據報稱將軍富

成追剿徐添德一股從營山趕往水東寺一帶

臣等恐陝省各匪勾合徐添德竄回陝境且富

成一路兵力稍單臣德楞泰自應帶領官兵前

往兜剿臣惠齡恒瑞查陝匪股數衆多設有分

竄德楞泰之兵亦恐不敷分布是以不敢拘泥

專辦羅冉二逆當卽分路兜截臣德楞泰挑帶

馬兵從柳林鋪抄擊臣恒瑞從萬安場抄截不

使竄越陝境並飛咨富成併力環攻時富成追

剿徐添德樊人傑至觀紫場已與高均德等會

合查觀紫場西北可通蒼溪巴州臣德楞泰卽

督兵從北面剿殺斃賊四百餘人又經索倫吉

林官兵射斃賊匪二百餘人臣恒瑞從右面兜

剿殺賊三百餘人適臣惠齡帶兵由雞公嶺抄

來正遇竄回各匪迎頭截殺又斃賊三百餘人



該匪等竄至璧山廟土門舖一帶又探得復興  
場二道河一帶亦有賊匪擾我後路臣惠齡隨

卽帶兵前往該處剿捕臣恒瑞德楞泰星夜分

爲兩路一攻璧山廟一攻土門舖天甫黎明賊

匪正在炊爨官兵齊集壓擊賊匪驚惶無措又  
被殺死六百餘名生擒周從忠等三百七十餘  
名富成從走馬梁壓下斃賊二百餘名該匪等

拋棄牛馬衣物糧食捨命竄往觀音寺山梁負  
險抗拒當有黑龍江委驍騎校哈新查吉林委  
佐領巴彥保四川外委周志林等奮不顧身首  
先搶上山梁殺散賊匪哈新查等均受多傷

臣

恒瑞德楞泰帶兵追殺二百八十餘里沿途斃  
賊一千餘名生擒唐正耀等一百二十餘名官  
兵晝夜奔馳官員皆奮勉出力復探得賊匪竄入

雙合場

臣

德楞泰帶領馬隊乘夜追至該處衝

入賊隊斃賊五百餘名

臣

惠齡將復興場二道

河竄匪剿盡後從天池寺帶兵趕到又斃賊二

百餘名餘賊紛紛敗竄我兵追至徐家場稍歇

馬力隨探聞賊匪竄至集龍場

臣

等卽督兵追

往官兵一湧壓下斃賊四百餘名生擒李道前

等四百餘名賊又狂奔定汎寺山梁屯紮

臣等

督兵搶撲賊膽敢連壓三次

臣

德楞泰帶同阿

哈保阿穆勒塔侍衛墨爾歡保富森德各領官

兵分路搶上又殺賊五百餘名生擒張國治等

二百四十餘名戍刻將山梁盡行奪占委叅領

桂保委防禦穆騰額長德委驍騎校尙諾爾守

備鄭振貴均各受傷徐添德一股奔逃舟口富

成率兵追往

臣

惠齡當卽飛札蓬州牧督率兵

勇嚴加堵截並將船隻收回對岸以防搶渡其餘各股均竄赴風峒舖一帶臣德楞泰帶領索

倫吉林馬隊抄出賊前賊匪見卽奔潰我兵分

投趕殺

臣

惠齡恒瑞帶兵截剿直至風峒舖沿

途殺獲三百餘人偵探賊蹤分由倒流河青山

溝竄至郭家溝一帶仍依羅其清屯聚

臣

等卽

日分路剿捕務須乘勢殲除計此次截剿四晝

夜殺賊四千餘名擒獲千餘名訊據唐正耀等  
俱無要供概行正法再查索倫吉林官兵此次  
最爲出力惟因晝夜趕剿不能休息並山逕崎  
嶇所騎馬匹倒斃疲乏者甚多臣等飛咨勒保

福寧等於就近滿漢各營內挑選數百匹解送  
軍營以資乘騎再據營山縣知縣謝惟良稟報  
八月初七日探得羅其清夥黨五六千人分走

濟川橋佛兒山兩路一撲縣城一撲川北鎮營  
盤當卽彼此防備商令都司陳全義千總張順  
帶領兵勇二千名先往九子嶺林內埋伏該縣  
率同武舉賈元寧帶領鄉勇礮位分往獅子嶺  
對山接應留都司景坤及典史訓導等在城督  
同兵勇防禦午刻賊由九子嶺前來陳全義等  
卽率伏兵截剿該匪等直奔獅子嶺希圖佔據

攻城謝惟良等在對山排列鎗礮連環轟擊賊  
匪抵死抗拒適朱射斗擊退濟川橋賊匪帶領  
兵勇趕來策應賊匪富由雙溝河一帶奔逃生  
擒張碎勝等九名殺賊五百四十七名隨將兵  
勇撤回城內詎賊匪等復于是夜二更率衆圍  
城竟敢背負竹梯拚死攻撲當被兵勇截斃二  
人並將竹梯砍斷復經朱射斗帶兵接應前來



賊始逃散此次鎗斃賊匪三十四名隨訊提張  
碎滕供稱此起賊匪係羅其清所差羅朱二姓  
頭目帶領攻城均已被破擊斃餘無要供當卽  
正法等語嗣據朱射斗稟報亦復相同查羅其  
清等公然遣衆攻城該縣謝惟良竟能設法堵  
剿朱射斗兩次帶兵擊退並有斬獲均屬勇往  
臣等仍飭令該鎮縣等嚴督兵勇實力防護城

池毋稍踈懈

同日宜綿奏言張漢潮一股竄匪經官兵連次  
截剿後折入南江總欲由陝西仍回湖北明亮  
跟蹤剿捕復逸出回軍壩一帶東奔秦承恩於  
城固一帶派兵截擊王文雄亦自西路堵剿

臣

正在紫陽一帶巡查卡隘一面札飭關騰仍駐  
兩河扼要防堵遂帶官兵八百名馳抵石泉賊

已竄至梅湖地方因船隻盡攏北岸未能潛渡  
仍在南岸屯住是夜密派遊擊蕭福祿典史鍾  
尙綱義勇方登泰生員王永建等帶領兵勇一

千餘名從黑石頭上流潛渡南岸突至賊營砍  
殺北岸兵勇亦俱持炬助威賊盡慌亂當被殺  
死四百餘名生擒三十餘人訊非緊要頭目俱

卽正法餘匪乘夜竄入黃黑壩一帶

臣

查該處

翻山卽係紫陽之瓦房店地方賊若由此路竄  
赴安康平利闖入楚境尤爲可慮遂令關騰帶  
兵星赴滔河之磚坪一路迎頭遏截一面飛札  
柯藩駐守木竹坪要隘慶溥趕赴紫陽江岸以  
防偷渡臣卽由石泉趕回紫陽復派叅將韓加  
業知府周光裕帶領兵勇八百名在西鄉紫陽  
連界之納溪壩地方同該處團勇千餘名分伏

兩山背後盡撤遊騎以示空虛賊匪果於夜間  
潛至正在覓徑疾走伏兵齊起鎗礮並發賊斃  
賊匪三百餘人擊死執旗頭目二人其滾崖落  
澗者亦復不少餘匪捨命狂奔復由老林一帶  
西竄未能衝入紫陽境內但紫陽西鄉處處相  
連該匪等窮竄逃生有一線可通之路卽思免  
脫總欲竄回楚省現在官兵無多勢難處處嚴

防惟有隨時設法相機堵剿協同明亮王文雄  
等趕緊淨殲均奏入

上命軍機大臣傳諭勒保宜綿惠齡恒瑞富成明亮  
德楞泰曰羅其清等各股賊匪分據箕山一帶惠  
齡等自應乘各首逆屯聚一處之時併力攻圍絕  
其竄逸且羅其清與冉文儔有隙賊黨業已內離  
若能設法用間使之互相吞噬俾官兵得乘勢制

勝更可收事半功倍之效乃惠齡等計不出此株  
守多時迨羅其清賊衆被官兵誘令下山剿殺高  
均德等各股賊匪聞風驚竄富成追剿之徐添德  
等一股又自營山前來合夥惠齡等不能預籌堵  
截徒使將士晝夜奔馳分投追剿雖斬獲多名而  
餘匪仍折回與羅其清屯聚各股著名首逆並未  
擒獲一名不足爲功其剿殺之賊匪諒不過裏脅

附和之衆摺內張大其辭未可深信惠齡等帶如  
許勁兵剿此敗竄無能之賊日久總未蕪事每遇  
剿賊打仗猶復覩顏鋪叙惠齡恒瑞富成德楞泰  
著再傳旨嚴行申飭現在各股賊匪仍折竄郭家  
溝一帶與羅其清株守之箕山相近而羅其清又  
分遣夥黨攻撲營山縣城徐添德一股又奔逃舟  
口可見賊匪來去自如毫無攔阻惠齡等務須親



率官兵嚴密攻圍或於要隘地方設伏邀擊或乘  
首逆猜忌之時設計辦理將各首逆按名擒獲稍  
贖前愆若一時不能將各股賊首全數擒縛與其  
東西馳擊兵無定向莫若併力攻剿羅其清一股  
此股賊衆較多各賊藉其聲勢結寨相依如將羅  
其清擒獲其餘各賊無所倚恃自必瓦解則剿辦  
較易爲力况羅其清負嵎據險一經誘令下山卽

剿殺多人可見吉林黑龍江勁兵在平坦地方衝鋒馳驟更爲趨健得力惠齡等不可徒事仰攻致稽時日總兵朱射斗知縣謝惟良俱着咨部議叙示獎又據宜綿奏截剿張漢潮情形此股賊匪屢經官兵剿殺總未成擒又任竄至石泉一帶明亮與肇亦著嚴行申飭至勒保所剿冷添祿林亮功兩股賊匪如數日內已將賊首擒獲肅清川東再

赴川北固所深望倘畧需時日該處賊匪無多且  
已困守空山何不於得力提鎮將領內酌留數人  
帶兵在彼剿辦勒保當統領勝兵速赴箕山督同  
惠齡等先將羅其清等大股賊匪剿淨更爲得力  
仍在勒保酌量而行看來惠齡明亮等兩路俱不  
足恃惟望勒保乘此軍聲大振之後當秋令涼爽  
之時所向成功如期奏捷也